

Penduduk Ranau diminta ceriakan kawasan pekan

- 2022-09-18T10:41:18+08:00



CENDERA KENANGAN: Masidi (lima kanan) menerima cendera kenangan daripada Jumain.

RANAU: Penduduk di daerah ini diminta untuk menanam pokok bunga hidup sebagai usaha untuk menceriakan lagi kawasan pekan dan bangunan kerajaan yang ada.

Menteri Kerajaan Tempatan dan Perumahan Sabah, Datuk Seri Panglima Masidi Manjun berkata usaha itu bukanlah tanggungjawab Pihak Berkuasa Tempatan (PBT) semata-mata.

Katanya, semua penduduk di daerah ini perlu mempunyai rasa tanggungjawab bersama tanpa mengira agama dan ideologi politik.

“Memandangkan daerah ini adalah antara destinasi pelancongan penting di Sabah, maka kecantikan, kebersihan dan keselamatan perlu diberi keutamaan.

“Terdapat banyak lagi kawasan masih kosong di pekan yang dilihat perlu ditanam dengan pokok-pokok bunga supaya panorama dan udaranya sentiasa segar,” katanya.

Beliau yang juga Ahli Dewan Undangan Negeri (ADUN) Karanan berkata demikian ketika merasmikan Program Pembangunan Komuniti Daerah Ranau di sini baru-baru ini.

Dalam pada itu, Masidi turut mempertimbangkan untuk menyediakan hadiah wang tunai sempena Pertandingan Kecantikan Lokasi yang akan diadakan tidak lama lagi.

Mengulas mengenai program itu, Masidi berkata ia adalah anjuran Kementerian Kerajaan Tempatan dan Perumahan (KKTP) dengan kerjasama Majlis Daerah Ranau (MDR).

“Ia bertujuan memupuk kesedaran sikap tanggungjawab terhadap diri, keluarga dan orang lain, disamping memperkenalkan program ‘recycle’ bahan harian terpakai .

“Selain itu, untuk memberikan pengetahuan berkaitan status semasa COVID-19 dan prosedur operasi standard (SOP) yang digariskan di Sabah,” katanya.

Terdahulu, program yang dihadiri lebih 500 orang penduduk termasuk pegawai dan kakitangan kerajaan serta pemimpin masyarakat setempat itu menjalankan pelbagai acara menarik.

Antaranya, pameran serta penyampaian sijil peserta pertandingan kebersihan tandas awam, swasta, premis pekan Ranau dan Kundasang.

Turut hadir, Timbalan Menteri Dalam Negeri, Datuk Jonathan Yasin; Pegawai Daerah Ranau, Jumain Abd.Ghani dan Pegawai Eksekutif MDR, Jupirin Rohimin.

- oleh Hamzah Sanudin